


广佛丛书系列

大悲心陀罗尼经

大悲心陀罗尼经

新平佛堂
PDG

千手千眼观世音菩萨 大悲心陀罗尼经



释迦牟尼佛

千手千眼观世音菩萨 大悲心陀罗尼经



大慈大悲观世音菩萨

千手千眼观世音菩萨 广大圆满无碍大悲心 陀罗尼经

唐西天竺沙门伽梵达摩 译

如是我闻。一时释迦牟尼佛，在补陀落迦山，观世音宫殿，宝庄严道场中。坐宝师子座。其座纯以无量杂摩尼宝，而用庄严。百宝幢幡，周匝悬列。

尔时如来於彼座上，将欲演说总持陀罗尼故，与无央数菩萨摩訶萨俱。其名曰。

总持王菩萨。	宝王菩萨。
药王菩萨。	药上菩萨。
观世音菩萨。	大势至菩萨。
华严菩萨。	大庄严菩萨。
宝藏菩萨。	德藏菩萨。
金刚藏菩萨。	虚空藏菩萨。

弥勒菩萨。 普贤菩萨。

文殊师利菩萨。

如是等菩萨摩訶萨，皆是灌顶大法王子。

又与无量无数大声闻僧，皆行阿罗汉十地，摩訶迦叶而为上首。

又与无量梵摩罗天，善吒梵摩而为上首。

又与无量欲界诸天子俱，瞿婆伽天子而为上首。

又与无量护世四王俱，提头赖吒而为上首。

又与无量天，龙，夜叉，乾闥婆，阿修罗，迦楼罗，紧那罗，摩睺罗伽，人，非人等俱，天德大龙王而为上首。

又与无量欲界诸天女俱，童目天女而为上首。

又与无量虚空神，江海神，泉源神，河沼神，药草神，树林神，舍宅神，水神，火神，地神，风神，土神，山神，石神，宫殿等神，皆来集会。

时观世音菩萨，於大会中，密放神通

光明。照耀十方刹土，及此三千大千世界，皆作金色。天宫，龙宫，诸尊神宫，皆悉震动。江，河，大海，铁围山，须弥山，土山，黑山，亦皆大动。日月珠火星宿之光，皆悉不现。

於是总持王菩萨，见此希有之相，怪未曾有。即从座起，叉手合掌，以偈问佛。如此神通之相，是谁所放。以偈问曰。

谁於今日成正觉。普放如是大光明。
十方刹土皆金色。三千世界亦复然。
谁於今日得自在。演放希有大神力。
无边佛国皆震动。龙神宫殿悉不安。
今此大众咸有疑。不测因缘是谁力。
为佛菩萨大声闻。为梵魔天诸释等。
惟愿世尊大慈悲。说此神通所由以。

佛告总持王菩萨言。善男子。汝等当知今此会中，有一菩萨摩訶萨，名曰观世音自在。从无量劫来，成就大慈大悲。善能修习无量陀罗尼门。为欲安乐诸众生故

密放如是大神通力。佛说是语已。

尔时观世音菩萨，从座而起。整理衣服，向佛合掌，白佛言。世尊。我有大悲心陀罗尼咒，今当欲说。为诸众生得安乐故。除一切病故。得寿命故。得富饶故。灭除一切恶业重罪故。离障难故。增长一切白法诸功德故。成就一切诸善根故。远离一切诸怖畏故。速能满足一切诸希求故。惟愿世尊，慈悲听许。

佛言。善男子。汝大慈悲，安乐众生。欲说神咒，今正是时。宜应速说。如来随喜，诸佛亦然。

观世音菩萨重白佛言。世尊。我念过去无量亿劫，有佛出世，名曰千光王静住如来。彼佛世尊，怜念我故。及为一切诸众生故。说此广大圆满无碍大悲心陀罗尼。以金色手，摩我顶上。作如是言。善男子。汝当持此心咒，普为未来恶世一切众生，作大利乐。我於是时，始住初地。一闻此咒故，超第八地。我时心欢喜故。

即发誓言。若我当来，堪能利益安乐一切众生者，令我即时身生千手千眼具足。发是愿已，应时身上千手千眼悉皆具足。十方大地，六种震动。十方千佛，悉放光明，照触我身，及照十方无边世界。从是已后。复於无量佛所，无量会中，重更得闻，亲承受持是陀罗尼。复生欢喜，踊跃无量。便得超越无数亿劫微细生死。从是已来，常所诵持，未曾废忘。由持此咒故，所生之处，恒在佛前。莲花化生，不受胎藏之身。若有比丘，比丘尼，优婆塞，优婆夷，童男，童女，欲诵持者。於诸众生，起慈悲心。先当从我发如是愿。

南无大悲观世音。愿我速知一切法。

南无大悲观世音。愿我早得智慧眼。

南无大悲观世音。愿我速度一切众。

南无大悲观世音。愿我早得善方便。

南无大悲观世音。愿我速乘般若船。

南无大悲观世音。愿我早得越苦海。

南无大悲观世音。愿我速得戒定道。

南无大悲观世音。愿我早登涅槃山。

南无大悲观世音。愿我速会无为舍。

南无大悲观世音。愿我早同法性身。

我若向刀山。刀山自摧折。

我若向火汤。火汤自枯竭。

我若向地狱。地狱自消灭。

我若向饿鬼。饿鬼自饱满。

我若向修罗。恶心自调伏。

我若向畜生。自得大智慧。

发是愿已。至心称念我之名字。亦应专念我本师阿弥陀如来。然后即当诵此陀罗尼神咒。一宿诵满五遍。除灭身中百千万亿劫生死重罪。

观世音菩萨复白佛言。世尊。若诸人天。诵持大悲章句者。临命终时。十方诸佛。皆来授手。欲生何等佛土。随愿皆得往生。

复白佛言。世尊。若诸众生诵持大悲神咒。堕三恶道者。我誓不成正觉。诵持大悲神咒者。若不生诸佛国者。我誓不成

正觉。诵持大悲神咒者，若不得无量三昧辩才者，我誓不成正觉。诵持大悲神咒者，於现在生中一切所求，若不果遂者，不得为大悲心陀罗尼也。惟除不善，除不至诚。若诸女人，厌贱女身，欲成男子身。诵持大悲陀罗尼章句，若不转女身成男子身者，我誓不成正觉。生少疑心者，必不果遂也。若诸众生，侵损常住饮食财物。千佛出世，不通忏悔。纵忏亦不除灭。今诵大悲神咒，即得除灭。若侵损食用常住饮食财物。要对十方师忏悔，然始除灭。今诵大悲陀罗尼时，十方师即来为作证明。一切罪障，悉皆消灭。一切十恶五逆，谤人谤法，破斋破戒，破塔坏寺，偷僧祇物，污净梵行，如是等一切恶业重罪，悉皆灭尽。惟除一事，於咒生疑者，乃至小罪轻业，亦不得灭。何况重罪。虽不即灭重罪，犹能远作菩提之因。

复白佛言。世尊。若诸人天，诵持大悲心咒者，得十五种善生，不受十五种恶

死也。其恶死者。一者，不令其饥饿困苦死。二者，不为枷禁杖楚死。三者，不为怨家仇对死。四者，不为军阵相杀死。五者，不为虎狼恶兽残害死。六者，不为毒蛇虺蝎所中死。七者，不为水火焚漂死。八者，不为毒药所中死。九者，不为蛊毒害死。十者，不为狂乱失念死。十一者，不为山树崖岸坠落死。十二者，不为恶人厌魅死。十三者，不为邪神恶鬼得便死。十四者，不为恶病缠身死。十五者，不为非分自害死。诵持大悲神咒者，不被如是十五种恶死也。得十五种善生者。一者，所生之处，常逢善王。二者，常生善国。三者，常值好时。四者，常逢善友。五者，身根常得具足。六者，道心纯熟。七者，不犯禁戒。八者，所有眷属，恩义和顺。九者，资具财食，常得丰足。十者，恒得他人恭敬扶接。十一者，所有财宝，无他劫夺。十二者，意欲所求，皆悉称遂。十三者，龙天善神，恒常拥卫。十四

者，所生之处，见佛闻法。十五者，所闻正法，悟甚深义。若有诵持大悲心陀罗尼者，得如是等十五种善生也。一切天人，应常诵持，勿生懈怠。

观世音菩萨说是语已。於众会前，合掌正住。於诸众生，起大悲心。开颜含笑。即说如是广大圆满无碍大悲心大陀罗尼神妙章句。

陀罗尼曰。

南无喝啰怛那哆啰夜哪通作耶下仿此。
 南无阿唎哪。娑卢羯帝烁钵啰哪。菩提萨
 跢通作埵下仿此婆哪。摩诃萨跢婆哪。摩诃
 迦卢尼迦通作伽哪。唵。萨婆啰罚曳。数怛
 那怛写。南无悉吉利通作唵埵依蒙阿唎耶。
 娑卢吉帝。室佛啰楞驮婆。南无那啰謹
 埵。醯同醢唎摩诃。皤哆沙咩。萨婆阿他
 豆输朋。阿逝孕。萨婆萨哆。那摩婆萨跢
旧本失此五字那摩婆伽。摩罚特豆。怛姪
 他。唵。阿婆卢醯。卢迦帝。迦罗通作卢
 帝。夷醯唎。摩诃菩提萨埵。萨婆萨婆。

摩罗通作啰下仿此摩罗。摩醯摩醯唎驮孕。
俱卢俱卢羯蒙通作蒙。度卢度卢罚闍耶帝。
摩诃罚闍耶帝。陀同阤罗陀罗。地利尼。
室佛啰耶。遮罗通作啰下仿此遮罗。摩摩至此
称某甲受持罚摩啰。穆帝隶。伊醯移通作伊
醯。室那室那。阿啰唎佛啰舍利。罚沙罚
唎。佛罗通作啰舍耶。呼卢通作卢下仿此呼卢
摩啰。呼卢呼卢醯利。娑啰娑啰。悉利悉
利。苏卢苏卢。菩提夜菩提夜。菩驮夜菩
驮夜。弥帝利夜。那啰谨墀。地唎通作利瑟
尼那。波通作婆夜摩那。娑婆诃。悉陀夜。
娑婆诃。摩诃悉陀夜。沙婆诃。悉陀喻
艺。室幡啰耶。娑婆诃。那啰谨墀。娑婆
诃。摩啰那啰。娑婆诃。悉啰通作鲁僧阿穆
佉耶。娑婆诃。娑婆摩诃阿悉陀夜。娑婆
诃。者吉啰阿悉陀夜。娑婆诃。波陀摩羯
悉哆通作陀夜。娑婆诃。那啰谨墀幡伽啰
耶。娑婆诃。摩婆利胜羯啰夜。娑婆诃。
南无喝啰怛那哆啰夜哪通作耶下仿此。南无
阿利哪。婆卢通作罗吉帝。烁幡啰夜。娑婆

诃。唵。悉殿都。曼哆通作多啰。钵通作跋
驮通作陶耶。娑婆诃。

观世音菩萨说此咒已。大地六变震动。天雨宝华，缤纷而下。十方诸佛，悉皆欢喜。天魔外道，恐怖毛竖。一切众会，皆获果证。或得须陀洹果。或得斯陀含果。或得阿那含果。或得阿罗汉果者。或得一地，二地，三地，四地，五地，乃至十地者。无量众生，发菩提心。

尔时大梵天王，从座而起。整理衣服，合掌恭敬，白观世音菩萨言。善哉大士。我从昔来，经无量佛会。闻种种法，种种陀罗尼。未曾闻说如此无碍大悲心大悲陀罗尼神妙章句。惟愿大士，为我说此陀罗尼形貌状相。我等大众愿乐欲闻。

观世音菩萨告梵王言。汝为方便利益一切众生故，作如是问。汝今善听，吾为汝等略说少耳。

观世音菩萨言。大慈悲心是。平等心是。无为心是。无染着心是。空观心是。

恭敬心是。卑下心是。无杂乱心是。无见取心是。无上菩提心是。当知如是等心，即是陀罗尼相貌。汝当依此而修行之。大梵王言。我等大众，今始识此陀罗尼相貌。从今受持，不敢忘失。

观世音言。若善男子善女人，诵持此神咒者。发广大菩提心，誓度一切众生。身持斋戒。於诸众生，起平等心。常诵此咒，莫令断绝。住於净室。澡浴清淨，著净衣服。悬幡燃灯，香华百味饮食，以用供养。制心一处，更莫异缘。如法诵持。是时当有日光菩萨，月光菩萨，与无量神仙，来为作证，益其效验。我当时以千眼照见，千手护持。从是以往。所是世间经书，悉能受持。一切外道法术，韦陀典籍，亦能通达。诵持此神咒者。世间八万四千种病，悉皆治之，无不差者。亦能使令一切鬼神，降诸天魔，制诸外道。若在山野，诵经坐禅。有诸山精魑魅魍魉鬼神，横相恼乱，心不安定者。诵此咒一遍，是诸

鬼神，悉皆被缚也。若能如法诵持。于诸众生，起慈悲心者。我时当敕一切善神龙王金刚密迹，常随卫护，不离其侧。如护眼睛。如护己命。说偈敕曰。

我遣密迹金刚士。乌刍君荼鸯俱尸。
八部力士赏迦罗。常当拥护受持者。
我遣摩醯那罗延。金毗罗陀迦毗罗。
常当拥护受持者。我遣婆馱娑楼罗。
满善车钵真陀罗。常当拥护受持者。
我遣萨遮摩和罗。鸠阑单吒半祇罗。
常当拥护受持者。我遣毕婆伽罗王。
应德毗多萨和罗。常当拥护受持者。
我遣梵摩三钵罗。五部净居炎摩罗。
常当拥护受持者。我遣释王三十三。
大辩功德婆怛那。常当拥护受持者。
我遣提头赖吒王。神母女等大力众。
常当拥护受持者。我遣毗楼勒叉王。
毗楼博叉毗沙门。常当拥护受持者。
我遣金色孔雀王。二十八部大仙众。
常当拥护受持者。我遣摩尼跋陀罗。